

郭給諫疏稿
泰熙錄



泰

熙

錄

王文祿錄

中華書局

叢書集成初編

郭給諫疏稿（及其他一種）

中華書局出版發行

（北京王府井大街三十六號）

秦皇島市資料印刷廠印刷
一九八五年北京新一版

開本：七八七乘一〇九二毫米 三十二分之一
統一書號：一七〇一八·一五一

泰
熙
錄

此 據 百 陵 學 山 本
排 印 初 編 各 叢 書
僅 有 此 本

泰熙錄

大學士高拱一本議處科目人才以興治道事。臣惟國家之用人皆欲砥礪名節建立事功以共成熙平之治。非徒以一日之短長遂爲終身之定例。而故有所抑滯於其間也。今布列中外。自州縣正官而上。大較皆科目之人。而科目分數進士居其三。舉人居其七。然所謂進士舉人者。亦惟假此爲網羅之具。以觀其他日之何如。而非謂此必賢于彼也。國初進士舉人槩用。其舉人登八座爲名臣者。難以一二計。自後進士偏重。而舉人甚輕。至于今則極矣。其係進士出身者。則衆向之。甚至以罪爲功。其係舉人出身者。則衆薄之。甚至以功爲罪。上司之相臨。同列之相與。炎涼盈面。可鄙可羞之甚。而皆不自顧也。至于保薦。則進士未必皆賢。而十有其九。舉人未必皆不賢。而十曾無其一也。至于陞遷。則進士治績之最下者。猶勝于舉人。治績之最上者。卽幸有一二與進士同陞。然要其後日。則進士之俸多。而陞官又高。舉人之俸少。而陞官又劣也。若夫京堂之選。則惟進士得而舉人不復有矣。其偏如此。遂使進士氣常盈。舉人氣當怯。盈者日驕。每襲取而寡實。怯者日沮。率墮志而恬行。以故舉人皆不樂仕。苟年力尙壯。學未甚荒者。皆相與遷延冀倖一第。直至年邁學荒淪落已甚。然後出而就選。以爲姑用了事。云爾。間有一二壯年從仕者。又皆爲貧之故。求溫飽者也。若是而欲其有爲。胡可得哉。及其不能有爲。則又曰此輩果不堪用。然不知乃用人太偏所致。而非其本體果皆如此也。夫崇尚進士。纔三分耳。而

又使之驕。棄卻舉人。已七分矣。而皆使之阻。則天下之善政。誰與爲之。而民生奚由得安也。臣愚以爲欲興治道。宜破拘攣之說。以開功名之路。凡舉人就選者。初只以資格授官。授官之後。則惟考其政績。而不必問其出身。進士而優。則先之。苟未必優。卽後于舉人無妨也。舉人而劣。則後之。苟未必劣。卽先于進士無妨也。吏部自行體訪。但係賢能。一例陞取。不得復有所低昂。仍行都察院轉行各該撫按官。務除去舊套。但係賢能。一例保薦。亦不得復有所低昂。如舉人官未經保薦而陞取數多者。撫按官以不及論。其旣陞取之後。又惟論其政績。一例推轉。舉人之俸。不必加深。進士之官。不必加美。若果才德出衆。則一例陞爲京堂。卽上至部卿。無不可者。如此則拘攣之說破。而功名之路開。苟非至不肖者。必不甘于自棄也。至于舉人就選之時。又必稽其年貌。五十以上者。授以雜官。不得爲州縣之長。蓋州縣之長。責任艱重。須有精力者。乃可爲之。彼其精力旣衰。胡可爲哉。如此則人皆趨可爲之時。以赴功名之會。而甘于淪落者寡矣。夫舉人與進士並用。則進士不敢獨驕。則舉人皆益自效。而善政亦必多。卽未必人人皆然。而十分之中。少亦有可六七固已過半矣。善政多則民安。民安則國可富。而教化可興。熙平之治。可庶幾望也。臣誠愚昧。所以爲國謀者如此。伏惟聖明裁斷。勅下吏部施行。天下幸甚。奉聖旨。祖宗用人。原不拘資格。近來偏重太甚。以致人無實用。事功不興。覽卿奏。具見經濟宏猷。於治道人才。大有裨益。依議着實舉行。吏部知道。隆慶五年七月初一日。謄字訛。乞對真稿校正。

海鹽草莽小臣王文祿伏讀聖上嘉納輔臣議處科目人才以興治道疏。仰見君聖臣賢。天地交泰。雍熙

太平之立致云。聖旨曰。祖宗用人。原不拘資格。卽明揚無方也。曰。近來偏重太甚。以致人無實用。事功不興。監流弊宣大公公也。曰。覽卿奏。具見經濟宏猷。于治道人才。大有裨益。依議着實舉行。揚善用中也。夫中也者。大公無偏也。列望授受。曰允執厥中。由人稟天地之中以生也。奈偏匪中。炎涼低昂。益怯驕阻。均失矣。不有是疏。曲盡情僞。洞徹肺肝。態狀畢昭。纖毫莫遁。何以感動天聽。挽回世風哉。凡幸際昌期者。當竭中心之忠。養浩然中正之氣。不惜命。不愛錢。誓不負聖君賢輔之懇激。庶不忝天地父母之生成。設甘自輕。殃民蠹國。非夫也。猛省勉旃。文祿求志苟全。罔干利祿。秉彝同好。速梓廣傳。繼續修邊。政處卑官二疏。大忠至仁之心無窮。直欲野無遺賢。萬國咸寧。華夷大一統爾。前代賢輔能企乎。謹約熙平交泰義。曰泰熙錄。入學山中垂監云。